

## Nikeloosdach

Kinna, war das domols scheen,  
wie de Kuntz Hermann noch de Nikeloos gewöhn.  
Long vorhär hadda sisch's iwweeled,  
wasssa dissmol mache däht.

Er hat gebaschdeld, mit Gips sogaa.  
Wie gudd, dasses Marianne so gedullisch war.  
Alles is fabrizierd wor in dem seiner Kisch.  
Alles war belaacherd: Schpielschdään, Schränk unn Disch.

Es war halt schunn e greeßeri Sach,  
was de Nikeloos domols hat alles gemacht.  
20 Kinna, monschmol aach 30 onn da Zahl,  
ware vasommeld bei Wachnersch Paula im Saal.

Donn war's soweit, de große Dach war do:  
Kneschd Ruprecht is middem Nikeloos ingezoh.  
Zwei Zwersche kumme middem Lääderwänsche rinn,  
scheen geschmiggd, es Christkindsche huggt drin.

Mit Gesong is de Zuch dursch de Saal maschierd.  
Die Kinna sinn geschponnd: Was jetzt wohl passiert?  
Do hald de Kneschd Ruprecht dem Nikeloos  
e Buch hin – aarisch dick unn groß.

Do schdedd drin vunn jedem Kind geschrieb,  
wie's war, unaadisch odda lieb.  
Vum Nikeloos wird das vorgeläs.  
Oje, was der vunn jedem wääß?

Vor allem die Buwe hadda im Vaheer.  
Er froht, wer das bei de Wonnerunge wär,  
der im Wald nur Deiwelereie hat im Sinn,  
leed Klofda unn Holz in de Wäsch middenin.

Die Leit kinne grawwele unn gugge, wasse mache.  
Die Lausade stehn hinna de Bääm unn lache.  
De Nikeloos wedderd mit lauder Schdimm.  
Do schleischd gonz mudisch so e Klääna vorre hin:

„Das ware mir nit, wenischdens nit allään,  
de Kuntz Hermann war aach debei gewöhn.“  
Jetzt rufe se all durschenonner gonz laud:  
„Der is heit awwer nit do, der hat sisch nit getraut.“

Dem Nikeloos falld's schwär, ernschd ze bleiwe.  
Er duud ebbes in sei Buch eninn schreiwe  
unn vaschpreschd, wenn er denne Hermann mol sitt,  
dass der e ordendliche Abreiwung kritt.

Endlich war's donn soweit, jetzt wird beschert,  
Kneschd Ruprecht hat schunn de Sack geleert.  
E jedes Kind, ob klään odde groß,  
kritt e scheeni Tuut vumm Nikeloos.

Sofort wird geschpitzt, was do alles is drin,  
nodierlich Äbbel, Plätzja – was soll's sunschd schunn sinn.  
Doch uff äämol kummt e Iwweraschung eraus:  
Zum Vorschein kummt e Gips-Nikolaus!

Was honn die Klääne sisch do gefreit  
unn denke drohn vielleischd noch heit.  
Unser Junger hat ne uffgehob bis zum heidische Dah  
als Erinnerung, wie scheen's domols war.

Die Klääne vunn domols sinn heit nodierlich groß  
unn glaawe beschdimmd nimmeh onn de Nikeloos,  
Die Zeit is long vorbei, es war wirklich scheen  
Wie de Kuntz Hermann noch de Nikeloos gewähn.

Das Schpielsche hat sisch widderholl, so 2 bis 3 Jahr.  
Donn sinn die Buwe unn Mäde älder wor.  
Die Zworsche honn mol unnerm Disch gehuggd  
unn dem Nikeloos beim Ohnzieje zugeguggd.

Donoh honn se noch scheen alles mitgemacht  
unn hinnerhär uns onnere ausgelacht.  
Doch donn war fa uns alle klar:  
Mir wisse jetzt, wer immer de Nikeloos war.

*Helene Keller*